

lis Gnovis

■ GURIZE. Zovin speciâl

«Quel geniale ragazzo di Gorizia»: il quotidiano dal Pape, «L'Osservatore Romano», ai 18 di Fevrâr, al à sielzût chest titul par presentâ il dialic cun Sergio Campailla sul slas inteletual di Carli Michelstaedter. Il servizi, curât di Fabio Pierangeli, al onore 40 agns di studis e di ricercjis sul «zovin gjenial di Gurize che si de il laç al cuel vie pal 1910, cuant ch'al veve dome 23 agns». Di Michelstaedter Campailla al à studiât e curât la tesi mai discutude «La Persuasione e la Rettorica», l'«Epistolario», «Il dialogo della salute», il volum di prosis, di apolics e di recensioni «La melodia del giovane divino», lis «Poesie» e la biografie gnove cree «Un'eterna giovinezza. Vita e mito di Carlo Michelstaedter». «A son pôcs – seont il il vieli professôr universitari di Letaris talianis – chei ch'a àn provât, cun intransigence e cun autenticitât, la tension dal om viers l'assolût come Michelstaedter».

■ PLAIN. Artesan e furlanist

Ai 5 di Març, al cole il trigjesim di Mario Ferrari. Classe 1938, editôr e artisan, al jere a stâ a Plain di Pagnâ. La sô innomine e jere leade cu lis voris realizadis cuant ch'al jere titulâr di «Numismatica friulana», in Borc di Trep a Udin. Dal 1969, al veve tacât a produci medais e monedis, disegnadis dai grancj incisôrs de «Suele di Buje». Daspò dal taramot, al veve dât fûr une schirie di monedis – i «Francs furlans» – cussi preseadis e cussi praticichis ch'a jerin daûr a dâur la volte ai assegnâts di cjarte di 50, di 100 e di 200 Liris che, in chê volte, a vevin tacât a lâ ator simpri di plui stant che l'Italie, in crisi, no rivave nancje plui a cugnâ avonde minûts. Ma il so impegn culturâl al cjapave dentri ancje i leams cu la «Diaspore» (come promotôr de «Fieste dal Popul furlan» di Einsiedeln) e il sfrancjament de Glesie furlane (cu la publicazion dal «Messâl furlan pal an B» e dal volum «I salmos», voltâts di pre' Checo Placerean).

■ DAR ES SALAM. Art nostrane in stazion

L'innomine dai mosaiciscj di Patrie, in grazie di Giulio Menossi, si slargje ancjemò di plui ator pal mont. L'artisan, component dal Fogolâr di Lion, al à realizât i mosaics ch'a insiorin la stramoderne stazion gnove de capitâl de Tanzania, Dar es Salam. Il País african al è daûr a modernizâ la sô ferade, inviade ancjemò dal president Julius Nyerere e lungje mil 860 kilometris, e par chel al à stabilît un plan di gnovis stazions «high tech». Chê dulà ch'al à lavorât Menossi e à il colôr viole de gjeme locâl batiade tanzanite.

■ SAN MICJÊL. Contribuzions pe Fieste de Patrie

Ancje i Cumons conuardiês sot Vignesie – Cint, Conuardie, Fossalte, Gruâr, Puart, San Micjêl e Tei –, chest an, a podaran profitâ des contribuzions regionâls destinadis a la «Fieste de Patrie dal Friûl», parie cui Cumons des vieris provincis di Gurize, di Pordenon e di Udin. Il regolament, prontât di «ARLeF», al assegnarà 25 mil euros. Lis celebracions dai 3 di Avrîl a varan di memoreâ l'inovâl de istituzion dal stât patriarcjâl furlan di vie pal 1077. Il regolament, disponibil su www.arlef.it, al amet ativitâts par valorizâ lis lidris, la culture e la storie di autonomie dal popul furlan.

Miercus 3	S. Cunegonde	Domenie 7	III Domenie di C.
Joibe 4	S. Casimîr di Polonie	Lunis 8	S. Zuan di Diu
Vinars 5	S. Adrian martar	Martars 9	S. Domeni Savio
Sabide 6	S. Rose vergjine	Il timp	Zornadis ventôsîs



Il soreli
Ai 3 al iève aes 6.42
e al va a mont aes 17.56.



La lune
Ai 6 Ultin cuart.

Il proverbi
Robe une gjaline, ti mandin a la ghilotine;
robe un milion, no tu vâs nancje in preson.

Lis voris dal mès
E je ore di cimâ i pomârs e di tratâju
cuintri l'atac de cape dai morârs.

Ben confiscât, Ben comun

Ai 7 di Març e finis i agns
une Leç dabon
straordenarie

Dai 2 mil 486 Bens confiscâts a la criminalitât organizade che, vie pal 2018, si à rivât adore di destinâ par funzions sociâls e onestis, 4 a son chei te Regjon Friul-V. J. In grazie di chês destinazions (lis ultimis regjistradis tal lûc internet www.benisequestratificati.it/), si rive al totâl regional di 40 Bens in gjestion de «Agenzia nazionale per l'amministrazione e la destinazione dei beni sequestrati e confiscati alla criminalità organizzata» («Anbsc»), di 19 Bens bielzà destinâts e di 3 Aziendis ancjemò «in gestione». Cagnêris se confrontadis cui passe 17 mil Bens e cu lis mil e 465 Aziendis destinadis in dute Italie, ma un «Chivali» seriôs par ducj chei che no àn mai crodût a lis sflocjis de «Isola felice» e un «Spieli» par chei ch'a crodin che un vèr ûs sociâl e produtif dai Bens secuestrâts a lis mafios al sarès in stât di rinovâ fûr par fûr economie, stât sociâl, culture e etiche, massime in tims grivis di pandemie e di recession. Stant che, ai 7 di Març, la gloriose Leç 109/1996, ch'e à sfrancjât il principi dal confisc dai Bens dai



Un'ativitât a Erbè (Verone), li de «Base Scout Tartato-Tione», logade intun Ben confiscât

La Leç 109/1996
e varès di colpî
ancje i corots
e si domande
di finanziâ
la gjestion
dai Bens
incjamerâts
cui capitâi
secuestrâts
ai mafios

mafios, e finissarà 25 agns, la clape «Libera» (che in grazie de sô propueste di leç il Parlament al à svilupât la Leç Rognoni-La Torre dal 1982 cul principi de utilizazion sociâl dai Bens secuestrâts) e à profitât par inviâ une campagne par lâ ancjemò plui indevant. Il fondadôr, pre' Luigi Ciotti, al à publicât il coment «Beni confiscati alle mafie tra positività e criticità» (www.libera.it/schede-1539-beni-confiscati-alle-mafie-tra-positivita-e-criticita) e il «Gruppo Abele» al à stampât il studi «Benitalia. Economia, welfare, cultura, etica: la generazione di valori nell'uso sociale dei beni confiscati alle mafie», che si pues lei su la rêt des rêts (www.libera.it/documenti/schede/beneitalia.pdf). Un'altre contribuzion preziose e je chê che «Libera» e à curât in convigne cu la Conferenze episcopâl taliane. L'opare «Libera il Bene / dal bene confiscato al bene comune» e tamese «L'impegno della Chiesa italiana nei percorsi di legalità e giustizia sociale» (www.libera.it/documenti/schede/libera_il_bene_20_10_ultima.pdf)

Par che i Bens secuestrâts a diventin pardabon «Palestris di vite», cemût che ju à definîts Pape Francesc memoreant il judis Rosario Livatino cu la Comission parlamentâr cuintri de mafie, ai 21 di Setembar dal 2017, al vûl proviodût confiscs ancje cuintri dai corots; jutoris pai uficis judiziaris ch'a frontin chestis problematichis e il potenziament de Agenzie «Anbsc»; publicitât pes esperiencis di utilizazion dai Bens confiscâts; finanziament dai interventi di gjestion dai Bens e des Aziendis escomiadis cui capitâi secuestrâts ai mafios e trasparenze total sun dute la gjestion.

Mario Zili

Il piês virus al è chel da l'Ecomafia

Cuatri criminai ogni ore, par rivâ al totâl di 34 mil 648 vie pal 2019: la incressite dai delits cuintri dal ambient e je spaventose, tocjant un +23,1%, a pet dal 2018. No son buinis gnovis chês polarizadis di «Legambiente», ai 17 di Fevrâr, cuant che il scandai anul «Ecomafia» al à stât proferit, pal prin viaç, in Friûl. La çate da lis «Ecomafis» e fische ancje la Patrie, dulà che il 2019 al è stât il piês dai ultins trê agns (www.noecomafia.it/2020/friuli_venezia_giulia/).

ARLeF, consegne de bandiere dal Friûl intai Comuns

Eje daûr a tacâ la consegne des bandieris dal Friûl ai Comuns furlans che lis àn domandadis. La iniziative promovude de Agenzie Regional pe Lenghe Furlane - ARLeF e à vût un bon acet di bande des amministrazioni locals che cussi, in ocasion dai 3 di Avrîl, zornade des celebracions pe Fieste de Patrie dal Friûl, a podaran vistî di fieste i lôr comuns. La Agenzie Regional pe Lenghe Furlane, intai mès passâts, e à cjapât contat cun ducj i comuns furlans, metintsi a lôr disposizion pe distribuzion dal standart – ricognossût in maniere uficiâl cuntune leç regional – che al mostre, suntun fondâl celest, la innomenade acuille eraldiche colôr aur cu lis alis viertis. «La rispueste dai Sindics e je

stade une vore positive – al à marcât il president de ARLeF, Eros Cisilino -. La machine organizative e je za in vore di un pôc di timp e in curt o scomençarin cu la distribuzion, che e finirà in timp par podê celebrâ ducj insiem il 3 di Avrîl, piturand di celest e zâl i lûcs simbul de Patrie». La bandiere dal Friûl e je il setim vessil plui antic in Europe (1334). La origin de bandiere dal Friûl e rimonte ai tims dal principât dai Patriarcjis di Aquilee, clamât ancje Patrie dal Friûl o Stât patriarcjâl furlan, un stât sovran che dal 1077 al 1420 al guverniâ il Friûl e, in moments alternis, ancje altris territoris. L'esemplâr plui innomenât e antic de bandiere patriarcjâl al è esponût intal Museu dal Domo di Udin. La iniziative de ARLeF e rive un an dopo de



fieste «virtuâl» dal 2020: «Chê passade e je stade une fieste diverse dal solit – al à sclarît Cisilino -, ma che nus à fat viodi dute la passion straordenarie, il sintiment di union e di identitât dai furlans». Ancje se tal rispiet de campagne di distanziamet social #joorestiacjase, necessarie par vie dal moment che si sin cjatâts a vivi, pardabon in tancj a àn rispuidût ae iniziative de ARLeF. Cussi, a son stadis passe 500 lis fotografis di bandieris rivadis ae Agenzie di ogni cjanton dal Friûl, ma ancje di bande di furlans fûr de regjon o dal forest.

Messe par furlan

La Messe par furlan e ven cjantade ogni sabide a 5 e mieze sore sere (17.30), li de capele de «Puritât», dapruf dal domo. Sabide ai 6 di Març al cjantarà messe pre D. Volpe. Radio Spazio e trasmet sul moment la liturgjie.